

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“O te faaroo e ua bapetizohia, e ora ia; area o te ore e faaroo ra, e faahapahia ia.” Mareko 16: 16.

Nu. 9.

Tiunu, 1912.

Mat. 5.

Te Faaroo.

(Taioraa parau matamua i mua i te hoê pŭpŭ Peresibutero ra.)

⑥ TE *Faaroo*, o te parau matamua ia i roto i te haapaoraa i heheuhia mai e te tumu hoi o te mau parau-tia atoa ra, no reira i vai na te *Faaroo* i roto i te mau taioraa parau, o tei haapaohia ei haapapuraa i ta Iesu parau e tia'i. I te haapiiraa i te *Faaroo* nei, ia na ô tatou i te feruri, te matamua ra, o te *Faaroo* nei—eaha ia? Te piti ra, te tiaraa o te *Faaroo*; te toru ra, te mau hopea o tei tahe mai mai te *Faaroo* mai. Mai tei au i teie nanairaa ra ia na mua tatou i te faataa i te parau; o te *Faaroo* nei—eaha ia?

I roto i te pene hoê ahuru e ma hoê, e i te irava hoê, ua na ô maira o tei papai i te episetole i te mau Hebera: “E teie nei, o te faaroo nei, o te tiaturi (tumu) ia i te mau mea e tiaihia nei, e te ite i te mau mea aore e hi'ohia nei.” Na teie nei irava parau ua ite tatou e, o te *faaroo* nei, o te tiaturi ia o te mau taata i te vairaa o te mau mea aore i hi'ohia e ratou, e te tumu hoi ia o te itoitoe i roto i te mana'o o te feia maramarama.

Ahiri ua hi'opoa maite te mau taata ia ratou iho, e ahiri ua faafariu ratou i to ratou mau mana'o e to ratou mau feruriraa i te ohipa o to ratou iho mau aau, e ite oioi ratou e, o

te *faaroo* nei, e te *faaroo* ana'e hoi, o te tumu mau ia o te mau itoitō atoa i roto ia ratou ra; e aore ia e parahi faatau noa te aau e te tino, e e faaea roa to ratou itoitō, to te aau e to te tino atoa hoi.

Ahiri ua ho'i teie nei pūpū taata i muri roa ma te feruri maite i te tuatapapa o to ratou mau oraraa nei, mai te tau i haamana'ohia e ratou e tae roa mai i teie nei, e ani hoi ia ratou iho e, eaha ra te tumu i ohipa vau, e aore rā, eaha ra te mea o tei horoa mai i te puai e te itoitō i te raveraveraa i to ratou mau toroa, e i ta tatou mau ravea, e i to tatou mau ohipa tia? Eaha ta ratou pahonora a i reira? Eita anei ratou e pahono e, o te tiaturi ia o tei roaa mai ia ratou i te vairaa i te mau mea aore e hi'ohia na e ratou i teie nei? E ere anei ia te tia i noaa ia outou no to outou faaroo i te vairaa i te mau mea aore e hi'ohia e outou, o tei faaitoitō ia outou i te ohipa puai, ia noaa taua mau mea ra? Aita anei outou i tiaturi nei i te *faaroo* i te roaaraa mai o te ite, e te paari, e te maramarama? E itoitō anei outou i te imiraa i te ite e te paari, maori rā ua faaroo outou e, e tia ia outou ia noaa mai taua mau mea ra? I ueue na anei outou, ia ore i faaroo na outou, e ooti outou? I tanu na anei outou i te huero, ia ore outou i faaroo na e papai outou? I ani na anei outou, maoti rā ua faaroo na outou e farii? I imi na anei outou, maoti rā i faaroo na outou ia iteahia? E aore rā, i patoto na anei outou, maoti rā i faaroo na outou e iritihia na ia ia outou na? E aore rā te vai ra anei te hoê ia mea, i te pae tino, e aore rā i te pae manava, e faaotihia na e outou, maori rā ua na mua i te faaroo e oti ai taua mea ra? E ere anei ta outou mau ohipa atoa i haamauhia i nia i to outou faaroo? Eita anei e tia ia ui atu e, tei ia outou anei te hoê ia mea, o tei ore i noaa ia outou na i to outou faaroo?

O ta outou ia maa, e ta outou ia aahu, e to outou ia mau fare, aore anei te reira mau mea i noaa ia outou no to outou faaroo? A feruri maite outou, e uiui papu outou ia outou iho, e parau mau anei teie mau mea? E feruri faahou

to outou iho mau mana'o, e ite outou o te faaroo nei, o te tumu mau ia no to outou atoa ra mau itoito; e mai te mea o te tumu mau ia no to outou iho itoito, e ere anei ia te tumu mau no te itoito i te feia maramarama atoa?

Te vai ra hoi te *faaroo* ei tumu no te mau ohipa i to te tino nei, oia atoa i to te varua; na te Faaora iho i parau mai, "O te faaroo e ua bapetizohia, e ora ia." Mareko 16: 16. Mai ia tatou hoi i roaa, na roto i te *faaroo*, te mau mea maitatai o te pae tino nei, mai te reira atoa hoi, na roto i te *faaroo* i roaa ia tatou te mau mea maitatai i te pae varua ra. E ere râ te *faaroo* te tumu no te mau itoito atoa ana'e ra, o te tumu atoa ia no te mana, tei te feia i te ra'i, e i te fenua atoa hoi. Ua na ô atoa mai nei o tei papai i te epistole i te mau Hebera, pene 11, irava 3: "No te faaroo i ite ai tatou e, no te parau a te Atua na ao i hamanihia'i, e ere hoi te mau mea hi'ohia nei i to te hoê mau mea i itea ra." Na teie i ite ai tatou e, o te tumu mana tei roto i te Atua, e na teie mana te mau ao i hamanihia'i, e o taua mana ra, o te faaroo ia; e na teie tumu mana, tei roto i te Atua, i vai â te mau mea atoa i hamanihia ra, no reira te vai ra te mau mea i te ra'i e i te fenua no te *faaroo* tei Ia'na.

Ahiri aore e faaroo, aore te mau ao nei i hamanihia na, aore atoa te taata i hamanihia na no roto mai te repo fenua. O te ravea hoi ia e ohipa'i o Iehova, e no te reira i mana'i oia i to te tino nei, e i to te varua atoa hoi. Ia rave-ê-hia'tu teie mana, e aore e atiribute (o te hoê atiribute ia te faaroo no te Atua), e ore Oia e vai. O vai tei ore i ite e, ia hamani te Atua i te mau ao na roto i te *faaroo* ra, tei na taua faaroo i mana'i Oia ia ratou, e taua mana o te *faaroo* ia? E mai te mea o te *faaroo* o te tumu mana ia, tei te taata mai tei te Atua atoa te huru e tia'i. O tei faaitehia teie e te mau papairaa mo'a, e o te haapiiraa teie ta ratou i tamata i te haapii mai i te taata nei.

Ua na ô maira te Mesia, a faaite mai ai Oia i te tumu i ore ai i tia i Ta'na mau pipi i te tiavaru i te diabololo, no te faaroo ore: "Oia mau hoi, teie ta'u e parau atu ia outou nei, ahiri e faaroo to outou, e mai te hoê huero sinapi noa iho te rahi, e tia ia ia outou ia parau noa'tu i teie nei mou'a, A haere i ô atu, e na'na ia e haere noa, e aita roa e mea e ore te tia ia outou." Mataio 15: 19, 20.

Na Moroni i faaite mai i te mana o te faaroo, a haapoto

ai, e a papai atoa'i i te tuatapaparaa parau o to'na hui tupuna. Ua na ô maira oia i Etera 12: 13, 14: "Inaha no te faaroo o Alama e no Amuleka ra, i taahitumuhia'i te fare tapearaa. (Mai tei au i Alama 14: 27.) 14 Inaha no te faaroo no Nephi, e o Lehi ra, i faahuru-ê-hia'i te ati Lammama, e i baptizohia'i ratou i te auahi e te Varua Maitai. (Mai tei au i Helamana 5: 44.) Oia'toa na te faaroo i pee ai te mou'a ra o Zerina, ia parau atu te taeae o Iareda i te i'oa o te Fatu." (A hi'o i te Etera 15: 30.)

Ua faaite-atoa-hia i te episetole i te mau Hebera, 11: 32, 33, 34, 35 e, na Gideona, ratou o Baraka, e o Samasona, e o Iepheta, e o Davida, e o Samuela e te mau peropheta, na te faaroo ratou i haapau i te mau basileia, e i rave i te parau-tia ra e i noaa i tei parauhia maira, e i opani i te vaha o te liona, e i tinai hoi i te puai o te auahi, e i ora i te mata 'o'e ra; i faaetaetahia'i i te paruparuraa, aito roa'tu hoi i te tama'i, i fati atura hoi ia ratou te mau nuu no te fenua êê ra, e i noaa faahou i te mau vahine ta ratou mau tamarii i pohe ra, etc., etc. Iosua 10: 15.

E teie nei, ua ite tatou e, te parau maira te mau papairaa mo'a, ua ravehia teie nei mau mea atoa na roto i te faaroo. No te faaroo i hamanihia'i te mau ao. Ua parau te Atua, haapao atura i te mau mea i vai ano noa ra, riro atura ia ei mau ao, na roto i te faaroo tei roto ia'na ra.

Ua na reira atoa hoi ia i te taata; na te faaroo i parau atu ai te taata na roto i te i'oa o te Atua, faaea ihora te mahana, haapao atoa te maramarama; pee atura te mau mou'a, mairi ihora te mau fare tapearaa, opanihia ihora te vaha o te liona, riro atura te riri i te aau; e te mana o te mau nuu, e te mâta'u o te 'o'e, e te mana'toa hoi o te pohe, ua oti teie mau mea atoa na roto i te faaroo tei roto i te taata.

Ahiri aore e faaroo to te taata, ua parau faufaa ore noa ratou i te mahana, e te maramarama, e te mau mou'a, e te mau fare tapearaa, e te aau taata, e te auahi, e te mau nuu, e te 'o'e, e te pohe. No reira, o te Faaroo nei, o te tumu matamua ia, tei roto ia'na te mana, e te puai, e te faatere i nia i te mau mea'toa; no te faaroo i vai ai ratou e i faatiahia'i hoi; no te faaroo i faahuru-ê-hia te mau mea, e aore râ i vai noa â i to ratou huru mau, mai tei au i to te Atua hinaaro. Aore e faaroo, aore roa e mana, aore atoa hoi te mau mea e vai nei.—IRITIHI E FARANI FULUMARE.

Te Parau Tuatapapa no
Iosepha Semita.

(TUATIRAA.)

PENE XXI.

MATAHITI 1834.

Te vero ri'ari'a i nia i te anavai ra, i Fishing. Te taeraa mai no te taata ra, o Col. Scone. Ua tupu te ma'i ino i roto i te nuu. Ua roohia Iosepha e te ma'i. Ua faatiahia te hoê Apooraa Rahi i te mataeinaa ra, i Cale.

[MUA iti a'e i te mairiraa o te mahana, i te 19 no Tiurai, 1834, te tia ra e piti hanere taata i te pae apatoa no te anavai ra, no Missouri; te tia ra e hitu ahuru taata ia ratou i te pae atu no taua anavai ra, e te haere maira e ono ahuru taata, no ô mai i te mataeinaa ra, i Re, e farerei mai ia ratou. Tei ia ratou e hope roa'e ta ratou mau mauhaa tama'i, e ua hau ratou i te ino i te mau taata'toa, no te mea ua ruuruu pinepine atura ratou i te mau taata hapa ore, e tairi ia ratou, ia fatata roa'e ra to ratou poheraa; haamâta'u atura ratou i te mau vahine e te mau tamarii, ia haere atu ratou i roto i te pouri e te toetoe, e ua haapararî e ua tutui atura i to ratou mau fare i te auahi, e i taua taime ihora, te opua hua ra ratou i te taparahi i te mau taata.

I taua taime ihora, i te vahi atea rii, te patia atura e piti hanere taata i to ratou mau tiahapa, mai te faaineine ia taoto i reira i taua pô ra. O te hoê pūpū taata mâtā'u i te Atua teie, o tei haere maira, mai te vahi atea mai, i te afairaa mai i te maa e te ahua na te Feia Mo'a i Missouri. Te tamau noa ra teie nei mau taata i te Autahu'araa no Iehova Sabaota ra; ua haere maira ratou, mai tei au i Ta'na faauerā, e aita roa'tu ratou i hinaaro ia hamani ino i te hoê taata, area râ ua opua ihora ratou e, e ore ratou e haruhia, e e taparahihia, no te mea ua ineine ia tama'i atu e paruru ia ratou iho.

Ahiri te Atua i faatia i te enemi e tae mai i te nuu, ua tahe te toto mai te pape te huru, aita râ Oia i hinaaro ia taparahihia Ta'na ra mau tavini e taua mau taata iino ra. Ua tae maira te hora ia faaite atu i To'na ra mana rahi, e ua faaue atura Oia i te mata'i, e te patiri, e te ûa, e te ûa paari, e ua haapao ana'e atura ratou, e ua tupu te hoê vero ri'ari'a rahi roa. Ua bahau puai maira te ûa paari, e ua tapuhia te amaa no te mau raau, e te tô papaa, e ua haapaparî-roa-hia te tumu no te mau raau e rave rahi e te mata'i. Ua puai roa te uira, e te patiri, e te aueue noa ihora te fenua.

Ua moe roa i te mau taata, o tei faaino i te ohipa na te Atua, to ratou mâta'u-ore, e rurutaina roa ihora ratou i te ite i Ta'na ra riri rahi. Ua faarari-roa-hia ratou, e ua faa-inohia ta ratou mau ofai pupuhi; ua haere te ûa na roto roa i to ratou ahu, e ua haaparuparuhia to ratou mau tino. Aita to ratou e mau fare ei paruru na ratou, e no reira te parahi noa ra ratou i roto i te vero rahi, mai te feruri noa i te mau mea iino ta ratou i rave ra.

I rotapu i te Nuu no Ziona, aita roa'tu te ûa paari i mairi maira, e e iti roa te mata'i e te ûa. Ua paruruhia te tahi pae no ratou i roto i te hoê fare pureraa tahito, e poi-poi a'era, tono atura Iosepha i te tahi mau taata e aufau atu i te moni ei tarahu no taua fare ra. Aita roa'tu to te nuu i mâta'u i taua vero rahi ra, no te mea, ua ite ratou e, ua faatupu te Atua i te reira, ei paruru na ratou. I te poipoi, ite a'era ratou i te vai pue rahi roa, i ropu ia ratou e te enemi. E maha ahuru avae te hohonu no te anavai ra, no Fishing Rahi, i na mahana i mua râ, ua iti roa te pape i roto, e ua parau atura to te enemi e, ua riro te anavai ra, o Fishing Iti, e toru ahuru avae i te hohonu i roto i te hoê afa hora.

I taua mahana ihora, haere atura te nuu e pae maile i te tahi atu vahi, e ua faaea ratou i reira i na mahana e toru. A faaea'i ratou i reira, ua tae mai te hoê raatira no te ene-

mi, o Colonel Scone to'na i'oa, e e toopiti taata, e ia tae atura ratou i mua i te aro no Iosepha e te mau taeae, ua rurutaina te raatira, e aita i tia ia'na ia tia i nia. E hope a'e-ra to'na rurutainaraa, tia'e ra oia i nia, eui atura e, eaha hoi te opuaraa no te nuu. Ua parau atura oia e, ua aratai maira oia i te enemi no ō mai i te mataeinaa ra, i Re, e haamou i te Nuu no Ziona, area ua haaparuruhia ratou e te vero rahi, e ua ite oia e, na te Atua Mana-hope i paruru i teie nei mau taata.

Ua pahono atura te Peropheta ia'na e, ua haere maira te nuu e hoê tausani maile e afai mai i te maa e te mau mea e au i to ratou mau taeae e te mau tuahine i Misouri, e ia tauturu atu ia ratou ia ho'i faahou atu i to ratou mau fare. Aita ratou i hinaaro e haamanii i te toto, e ua afaihia mai ta ratou mau mauhaa tama'i, ei paruru ana'e na ratou. Te opua ra ratou i te haapao i te mau ture atoa, e eita e hamani ino i te hoê taata. Ua faaite atura Iosepha i te hamani-ino-raa-hia o te Feia Mo'a i te mataeinaa ra, i Iaketoni, e oti a'era ta'na ra parau, te tahe noa ra te roi mata no te raatira e ta'na na hoa. Ia ite ratou i te mau mea iino ta ratou i rave, ua tamata noa ratou i te faaore i te mau peapea ta ratou i faatupu, e ua haere atura ratou e ati noa'e i taua fenua ra, i te faaiteraa'tu i te parau mau no Iosepha e ta'na ra mau pīpī. Ua tae atoa maira te mutoi rahi no te mataeinaa ra, no Cale, o Korenelio Giliuma to'na i'oa, i te nuu, e ia ite oia i te tumu mau no to ratou haereraa mai, ua faaite atura oia i te tahi mau mea no te feia, e no te fenua, e a'o atura oia ia ratou ia tamata noa i te faaore i te peapea.

I te mahana 23 no Tiunu, haere atura te nuu i te mataeinaa ra, i Cale, i mua râ i to ratou taeraa'tu i reira, ua farerei mai te taata ra, o Atchison, te hoê haapii ture i tarahuhia ia paruru i te Feia Mo'a i Iaketoni, ia ratou, e ua a'o atura oia ia Iosepha e, eiaha e haere na roto i te oire ra, i Libereti, ia ore e tupu te peapea rahi. Ua haapao Iosepha i ta'na ra parau, e ua haere atura te nuu i fatata i taua oire

ra, e patia i to ratou mau tiahapa i nia iho i te ooa ra, o Rusa, i rotopu i te Feia Mo'a.

Ia orure atura o Silevesa Semita, e te tahi atu mau taata i te Peropheta, ua faaara'tura Iosepha ia ratou e, e faautua mai te Atua i te nuu no taua hara ra, e i teie nei taime, ua tae mai to ratou utua. Ua roohia ratou e te hoê ma'i ino roa tei tupu i rotopu i te nuu. Ua haamata teie nei ma'i ino i te tupu i te 24 no Tiunu, e ua roohia e ono ahuru ma vau taata, e i roto i na mahana e maha ua pohe roa e hoê ahuru ma toru taata.

Ua tuu atura Iosepha i to'na pue rima i nia iho i te hoê taata, mai te faahapa atu i te ma'i. Ua ora taua taata ra, area râ ua roohia Iosepha raua o Haeramu i taua taime ihora. I na taime e toru, tuu atura raua i to raua turi i raro i te pureraa'tu i te Atua no to raua ora, e ua opua raua ia tamata noa i te pure, e tae noa'tu i to raua faaora-raa-hia. I te hoê taime, a pure ai raua i te Fatu, ua ite Haeramu, i roto i te hoê orama, i to raua metua vahine, i Ketelani, i te pure-raa'tu i te Atua no ta'na na tamaiti. Ua faaroo te Atua i ta'na pure, e i ta raua, e ua tia raua i nia mai te maitai e te puai. Ua noaa i te Peropheta te haapiiraa faufaa rahi roa i teie nei taime, no te mea, ua ite oia e, ua opua ihora te Atua ia faautua mai i to te nuu no ta ratou hara, e e mea tia ore, ia rave oia i te mana no te Autahu'araa i te faafifi i te mau opuaraa mo'a ra no te Fatu.

Mau mahana ri'ari'a rahi roa teie, no te mea ua mairi te mau tia i raro, e ua faaroo-noa-hia te mau autâ no to tei mau iui, e e rave rahi te mau taata hapa ore tei roohia, area râ e noaa i teie nei mau taata hapa ore te utua maitai. I te hopea no taua na mahana ra, ua iteahia te hoê raau maitai no taua ma'i ino ra, e o teie ia, oia hoi, tuu i te taata tei pohe i te ma'i i roto i te pape toetoe, e aore râ ninii i te pape i nia iho ia'na.

A parahi noa'i to te nuu i roto i te ati rahi, te opua ra te enemi i te mau opuaraa iino, e ia faafifi Iosepha i te reira,

ua parau faaite atura oia e, e faataa ê oia i to te nuu tei tae mai i Missouri, e ua na reira'i oia i te 25 no Tiunu, 1834. Ua ite te Peropheta e, ua manuia noâ te nuu i te afai mai i te maa, e te ahu na te Feia Mo'a i reira, eita e tia ia ratou ia tauturu atu i te Feia Mo'a ia ho'i faahou atu i to ratou ihora mau fare, no te mea ua heheu maira te Atua i te reira ia'na.

I te mahana 3 no Tiurai, ua faatia Iosepha i te hoê Apooraa Rahi i te mataeinaa ra, i Cale, na te Feia Mo'a i Misouri. Ua faatiahia ia mai te Apooraa i Ketelani te huru, e ua faataahia o Davida Vitima, e na tauturu e toopiti, ei peresideniraa no taua Apooraa Rahi ra. Ua faaea ihora Iosepha i rotopu i te Feia Mo'a e hoê hebedoma, ei reira haere atura oia i Ketelani, e ua tae atura oia i reira i muri a'e i na mahana e toru no te ohipa rahi e te tereiaa ino roa.

—OLE PETESONA.

(E tuatihia mai teie parau.)

Te Mau Parau Api.

I TE mahana 12 no Tiunu, 1912, ua fanau te hoê vahine i te mataeinaa ra, i Papara, o Puaaniho to'na io'a; toomaha o'na tamarii, e tamahine ana'e.

Tei rotopu i te mau pahi manuâ o te hau Amerika te hoê pahi tahito roa, e 104 to'na matahiti i teie nei. I te avae Me, i mairi a'enei, ua faaue te hau ia haapararîhia taua pahi ra.

I te fenua ra, i Sudana, i Afarica, te amu noa nei â te tahi mau taata maohi i te repo. E rave rahi te mau huru maa i reira, aita râ ratou i hinaaro i taua mau huru maa ra. Te pao nei ratou i te fenua e amu noa i te tahi huru repo no reira mai.

I te 26 no Tenuare, 1912, i te hora hitu, i te ahiahi, ua tupu te hoê peapea i te fenua ra, i Rekareka, i rotopu ia Tefau a Igo e ia Irario a Tetaihuka. I taua taime ihora, ua tama'i, e ua taputo ihora, e muri iti ihora, taa'e atura te tahi e te tahi. O te re'o maira o Tefau i te piiraa mai e, "E mea ino roa ta oe e Irario." E mea patia i te tipî, mairi ihora o Tefau i raro i te repo, pohe roa ihora. Ua faautahia mai taua taata i patia ia Tefau ra i Tahiti nei, ei te 15 no Tiunu nei i haavâhia'i oia, e ia oti i te haavâhia, teie to'na utua, hoê ahuru matahiti e te mau taime no te haavâraa.

Te Ati Rahi o te Pahi ra o Tetania,
i te 15 no Eperera, 1912.

(PAHI BERITANI.)

TEIE nei pahi, o Tetania, o te pahi rahi roa ia i te ao nei. To'na rahi, e 46 tausani tane, to'na roa 882 avae, e i teie matahiti i mairi a'enei i tuuhia'i i roto i te miti, e i teie hoi avae no Eperera i mairi a'enei i oti roa ai.

I te mahana 11 no Eperera, 1912, ua haamata oia i to'na tere matamua. Ua reva oia mai Beritani mai e haere i Niu Ioka, Amerika, e te rahiraa o te horo patete i tere atoa na nia ia Tetania, oia hoi 1,470 taata; te rahiraa o te taata no te pahi iho, oia hoi, te taata tihepu, mai te raatira e tae noa'tu i te mataro, 800; e ia amuihia to te pahi, 800, e te horo patete, e 470, teie te taatoa, oia hoi 2,270 taata. Haere maitai noa taua pahi ra e tae noa'tura i te pô 15 no Eperera, ua û teie nei pahi i nia i te miti toetoe paari mai te fenua te rarahi, no te puai to'na tere e te paari hoi o teie nei miti toetoe, ua puta taua pahi ra i te aoao, e i taua taime ra, ua hiti mau te taata'toa no te hauti te pahi e no te poheraa te matini, aita roa râ te taata i mama'o e, e peapea rahi, no te mea teie nei mau pahi rarahi apî, e buru ê roa to ratou hamani. Ua tiaturi noa te taata i taua parau ra e ore roa teie nei pahi e tomo i raro. Rave rahi tei ho'i i roto i to ratou mau piha; arearea noa vetahi i roto i te piha arearearaa, e tae noa'tura i te taime i faaroohia'i te re'o o te raatirai te piiraa e, haere paatoa te taata i nia i te tahua o te pahi e taamu i te mau hatua ora, e faaineine i te mau poti, i reira te taata te huru papuraa e, ua roohiahia te pahi i te ati.

Te faaitoito noa ra te taata parau niuniu na te reva i ta'na ohipa; te pii ra oia i te mau pahi fatata mai e haere mai e tuaturu, e ua tae hoi taua aniraa ra i te mau pahi e rave rahi. Papu atura i te raatira rahi e, ua ino te pahi pii faahou mai oia e, haamata te taata e haere i nia i te mau poti te vahine ana'e te haere, faaea te mau tane, ua faaroohia hoi taua a'oraa ra, rave rahi râ hoi te vahine o tei patoi i te faarue mai i ta ratou ra mau tane i nia i te pahi, faatea haera atura te mau poti i tomo i te vahine e te tamarii. E piti hora i muri a'e i haamata'i o Tetania i te tomo, aita roa râ te taata i paruparu, ua na roto noa i te itoitoe te faariiraa atu i te pohe.

Te oto noa ra te upaupa o te pahi, e tae noa'tura i te taime hopea. Rave rahi hoi te haruru pupuhi i faaroohia, e ua mana'ohia e, ua imi te tahi mau taata i te pohe. Mea ri'ari'a te âue a te taata i taua taime ra, aita hoi te taata i manaa i nia i te mau poti, ou'a atura e vau hanere i roto i te miti, aita roa vera i maoro atu, no te mea e toetoe iti rahi te miti, pohe ana'e atura, e teie hoi te rahiraa o te taata i pohe, oia hoi e 1,637.

Te mua o Tetania tei na mua ona i te tomo, haere mārū noa oia, e i te taeraa te miti toetoe i roto i te mau pani, pararī atura te pahi na ropu, no te puai te veavea o te matini, e moe atura o Tetania i roto i te moana. Te mau poti, ra te painuha noa ra vetahi, te imi ra vetahi i te mau ravea; taime aroha taua taime ra te pii maira vetahi i roto i te miti, e homa, tii mai ia matou; pahono atura to te mau poti, eiaha e inoino, eita e manaa faahou, no te mea, ua tomo roa te poti e eita roa e ô faahou i roto, pii maira to roto i te miti, ia ora outou i te Fatu, aroha atu i to te fenua.

I te poipoi roa, ite atura te feia i oraora mai i te hoê auauahi i te atea, tupu ihora te oaoa. O Carpathia te tere maira ma te puai e haere mai e faaora ia ratou, te hoê ia pahi o tei faaroo i te piiraa a te taata taniuniu, o tei pohe atoa. Te hoperaa te taata i te ravehia e teie nei pahi, ho'i atura oia i Niu Ioka, i reira mea aroha te mau metua, e te mau fetii o tei pohe, e o tei ora mai; te tiaia ana'e maira vera i ta ratou mau tamarii, ta ratou mau tane, ta ratou mau vahine, e te mau hoa. Ua oaoa vetahi i te iteraa mai e, ua ora mai to ratou, area te mau feia i ite ai e, ua moe ê to ratou, tupu ihora te oto, e inaha noa nei. Ua tauturu mai te mau basileia i te feia i ati.

Te taata i papai i teie nei parau no Tetania, o te hoê ia horo patete i ora mai no roto i taua ati rahi faito ore ra, e te faaite maira oia e, eita roa teie ati e moe ia'na, eita hoi te tai a te feia i pohepohe e ore i roto i to'na tari'a, e te faatia mai nei e, ua matahiti e ua matahiti te Fatu te moeraa ia'u, e i to matou, e i taua taime ra ua ô faahou mai te Fatu i roto i to matou mau mana'o e, aita roa matou e faaea i te pure e te himene i te mau himene pureraa.

Te Poheraa no Tegahe a Rua.

E TUAHINE oia i roto i te Ekalesia a Iesu Mesia i te Feia Mo'a i te Mau Mahana Hopea Nei, i Hikueru. Ua mau maite oia i te faaroo e tae noa'tu i to'na poheraa. Ua tupu mai to'na ma'i i roto i te avae Tenuare, m. 1911, e tae noa'tu i te 27 no Atopa, i te hora 2 i te ahiahi, 1911. Ua pohe oia, e e poheraa maitai to'na.

Parahiraa o Parako, i te Sabati i te 22 no Atopa. Ua parau maira oia ia'u, "Ananahi e reva tatou i te oire e afai oe ia'u, ia farerei noa'e au ia Tufauhia; te poto mai nei to'u taime." Ua parau atu vau ia'na e, E poipoi a'era i te Monere, i te 23 no Atopa, ua reva'tura matou i te oire, o vau, e o Tegahe, e o Hinanui, e te mau tamarii, na nia i te poti ra, ia Manania. Ua tapae matou i te oire ra, i Tupapati, ua farerei oia ia Tufauhia i te 25 no Atopa, e ua ho'i atura te mau tamarii i roto i te 26 no Atopa. Ua na ô maira oia ia matou: "A tii te mau tamarii i roto e haere mai e farerei ia'u, te ineine nei au e haere, e a faarue mai ai ia outou." Ua faarue atura vau

ia Matagi e reva i roto e tii i te mau tamarii, ia Tearoha iti, e Vahua iti, e Teoro iti, e Temake, e Terogo, e Faukura, e ua tae mai ratou i te hora 6 i te pô. Ua rave atura oia i te mau tamarii, e ua oto ihora oia ia ratou. E muri a'e, paruparu roa oia. Ua na ô maira oia ia'u: "E mea maitai e faatahinu ia'u." Ua parau atura vau ia'na, e Tegahe aita e tia ia oe ia faatahinuhia. Ua na ô maira oia ia'u e, "Area râ e faatahinu noa mai ia'u no teie nei pô ana'e." Ua parau atura vau ia Tearoha ia faatahinu ia'na, e ua faatahinu Tearoha ia'na, e poipoi a'era, i te mahana pae, i te 27 no Atopa, ua paraparau noa mai oia i to'na mau mana'o maitatai, e te popou, ia faaroohia'tu ta'na mau parau, e muri a'era, ua na ô maira oia, "Teihea te mau tamarii?" Ua pahono atu vau, ua haere ratou. Ua na ô maira oia: "A haere; a tii, e haere mai ratou e aroha ia'u; ua fatata to'u taime." E i reira, ua tihia te mau tamarii. Ua parau maira oia: "E Tufauhia, haere mai e aroha ia'u." Ua haere atura o Tufauhia e aroha ia'na, e ua tae mai te mau tamarii. Ua aroha'tura oia ia ratou. Ua na ô maira oia ia matou: "Te ineine nei au i teie nei." Ua parau atu vau ia'na e, a faaitoito. Ua parau faahou atu vau ia'na, mai te mea, te ineine nei oe i teie nei, eiaha ia moe to oe pureraa. Ua na ô maira oia ia'u e, "Te parahi noa ra oia i nia; ua hi'o tia'tura oia i te pae ia Patoa." Ua parau atura vau ia'na, eaha ta oe e hi'o ra? Ua pahono maira oia ia'u: "Te ite nei au i na e'a e piti, tera e vai noa maira te e'a e haere i te vahi poiri, e te e'a e haere i te teatea, e te anaana rahi." Ua parau atura vau ia'na, a faaitoito i to oe tere maitai. Ua parau atura vau ia Temake e ia Tufauhia ma, te faaroo ra anei outou i ta'na parau. Ua pahono maira ratou: "E." Ua na ô faahou maira oia ia'u: "E mea roa." Ua na ô atura vau ia'na, te aha, to oe pureraa? Ua pahono maira oia ia'u: "E." Ua parau atura vau ia Tearoha e, te hinaaro nei oia e faaoti i to'na pureraa na mua'e, hou to'na poheraa. Ua faaoti Tearoha i to'na pureraa. Ua ani maira oia i te mau tamarii, e te mau taata atoa i tae mai i reira, e haere mai, e aroha ia'na, e ia oti to'na aroharaa'tu ia ratou, ua hi'o matou i to'na huru, mai te varea taoto ra ia.

Te porohia'tu nei outou, e te Feia Mo'a i te mau vahi atoa ia haamana'o i teie nei mau huru poheraa tura rahi, e te hanahana; tei roto ana'e i te Ekalesia a Iesu Mesia i te Feia Mo'a i te Mau Mahana Hopea Nei te reira huru, no reira titau maite tatou i te reira na roto i te faaroo i te Atua Torutahi, e te auraro i te Ekalesia.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.